

欽定剿平粵匪方略

欽定勅平粵匪方略卷二百八十六

壬戌年

正月初五日

戊子

慶端奏言准王履謙咨稱嚴州

之賊由桐廬富陽下竄勾通八槳礮船渡至臨

浦連陷蕭山諸暨兩城竄撲紹郡九月二十九

日府城失陷王履謙遇救出城飭員外郎謝敬

扼守百官渡一面馳赴甯波擬向該處官紳籌

餉撥兵合力堵剿詎上虞餘姚鎮海慈谿奉化

先後被陷甯波府城亦於十一月初八日失守
王履謙航海至閩催兵援勦等情又據署甯紹
台道張景渠稟紹郡失守後逆匪由奉化圍撲
甯波府城十一月初七日張景渠會督兵勇兩
次接仗斃賊四五百人初八日護提督陳世章
督同遊擊黃金祥等迎擊該逆集黨包抄我軍
傷亡不少郡城失陷張景渠身受矛傷陳世章

墜馬受傷均爲礮船所救等情查甯紹兩郡爲
東南財賦之區今旣相繼淪陷則浙西之餉源
已絕杭城更屬可危道員李元度率所部援杭
臣已飭令兼程前進所有前調衢州溫處進剿
各軍並經分檄嚴催務期步步爲營力圖攻剿
至王履謙欲赴臣營一節現在衢州等處臣統
帥暫駐建甯旣可就近調度卽左宗棠入浙亦

必由衢進兵無須王履謙來營會辦惟北路之
溫州旣氛環逼臣有鞭長莫及之勢溫處兩郡
民團均極得力若得王履謙馳赴激勸不特北
路藩籬可固且可會合閩師由台州金華規復
甯紹各城臣已咨王履謙查明辦理護浙江提
督陳世章署甯紹台道張景渠不能力遏兇鋒
以致甯郡失陷實屬咎無可辭應請

旨將陳世章張景渠一併革職責令帶罪整集潰軍
號召民團克復甯紹郡縣城池如再不知愧奮
卽行嚴叅治罪此外文武各官下落容俟查明
另辦

同日王履謙奏言查逆匪自攻陷紹興府城後
卽赴四鄉焚掠經臣派員外郎謝敬壯勇扼守
百官渡地方力遏賊衝一面馳往甯波籌商兵

餉旋探上虞餘姚奉化慈谿鎮海先後失守另
股賊匪攻陷甯波府城所有駐紮百官渡之謝
敬一軍不及三千名復被該逆四五萬之衆由
上虞餘姚夾擊萬難支持並聞處州台州先後
淪陷省圍日緊一日米糧不能運送入城目擊
時艱無可措手現惟溫州衢州一帶地方尙屬
瓦全臣已札飭溫衢各府集團保衛臣於十一

月十五日由定海乘船渡海十九日到閩督臣
已統兵出省駐紮建甯臣擬卽往督臣軍營會
商妥辦聞安徽逆匪全行來浙李元度一軍攻
勦龍游賊匪尙未得手現在安徽軍情較緩仰
懇

聖恩飭令曾國藩速撥勁旅由甯國就近援杭並左
宗棠一軍迅速赴浙助勦實於東南全局有裨

均奏八

上諭內閣曰前因紹興等府縣相繼失陷王履謙以
在籍大員幫辦團練漫無布置臨難蒼黃出城當
經降旨將該員革職拏問交曾國藩查辦茲據慶
端奏稱王履謙由甯波赴閩乞援經該督咨令赴
溫處兩郡激勸民團並據該革員附摺陳奏於十
一月十五日乘船渡海卽於十九日到閩各等語

王履謙於紹興失守之後猶不思激勵民團力圖補救乃徑行渡海赴閩藉口乞援實出情理之外王履謙既赴閩省距曾國藩軍營較遠著改交左宗棠將該革員拏問嚴行審訊按律治罪

上又諭內閣曰上年賊陷蕭山諸暨後乘虛竄擾紹興另股由奉化攻撲甯波郡城署浙江提督陳世章署甯紹台道張景渠不能力遏兇鋒以致郡城

失陷均屬咎無可追著一併革職拏問交左宗棠
嚴行審訊按律定擬具奏所有文武各官下落著
慶端一併查明具奏

同日毛鴻賓奏冒查石逆竄擾浦市後於十一
月二十一日分股竄赴瀘溪該縣知縣吳經炳
把總趙國忠會同紳士候選知府李保邦帶勇
赴隘設防賊已間道徑赴縣城吳經炳等馳回

堵禦因衆寡不敵吳經炳趙國忠均受傷倒地
經李保邦救出縣城遂被賊擾吳經炳等添調
團勇進剿二十四日江忠義所部精捷營由山
塘進攻浦市周洪印席寶田周達武等營亦由
辰州分道前進守備蔡文忠復率兵團踵至前
後夾擊賊勢不支悉向河溪竄逸二十五日吳
經炳督率團勇直薄縣城各營會之賊卽潰竄

周洪印等知賊將窺伺乾州拔營抵乾賊撲河
溪鎮溪兩營署河溪營都司王忠祿署鎮溪營
遊擊夏思忠等各率兵團迎戰因賊衆兵疲以
致潰退署乾州副將保慶等調派兵勇會王忠
祿等將賊擊走該逆逼近乾州見我軍守禦嚴
密未敢攻撲繞竄衛城進窺永綏署總兵慶成
同知陳秉鈞激勵兵練嚴爲之備賊分股撲城

未獲逞志衛城之賊經總兵劉元慶等會督官兵三路環攻斬獲無算餘賊擾及花園一帶該處近接秀山亦可取徑以趨永順保靖臣已嚴飭諸軍力守永保邊隘務令此股賊衆不至與龍山踞匪勾結並飭各該地方官整頓團練扼駐險要俟官兵到齊四面兜圍至來鳳一股攻撲龍山經我兵力戰獲勝賊仍退回臣前飭劉

嶽昭親督數營由湘鄂邊界進規來鳳據稟已
至施南俟該營到時須約會四川兵勇合剿儻
石逆與之合股則永順永綏兩路官兵亦卽會
合進擊所有瀘溪縣知縣吳經炳署浦市守備
蔡文忠署河溪營都司王忠祿署鎮溪營遊擊
夏思忠於賊蹤竄近未能力籌守禦以致縣城
營汛爲賊竄擾雖旋督兵勇將賊擊退究屬疏

於防範吳經炳應請卽行革職蔡文忠王忠祿
夏思忠均請革職仍留軍營效力贖罪此次守
城打仗出力文武員弁兵勇可否由 臣擇尤彙
案保獎出自

天恩至臬司劉坤一一軍因粵西張篙友股匪竄至
昭平有由富川賀縣窺伺楚邊之意已飭令督
隊回粵嚴密防剿奏八

上諭內閣曰上年十一月二十一日石逆由浦市分
撲瀘溪經該縣知縣吳經炳等督勇進剿賊勢不
支紛紛潰竄二十八九等日賊復撲乾州等處經
我軍三路環攻斬獲無算餘賊亦卽潰退瀘溪縣
知縣吳經炳署浦市守備蔡文忠署河溪營都司
王忠祿署鎮溪營遊擊夏思忠於賊蹤竄近未能
力禦以致縣城營汛均爲賊擾實屬疏於防範吳

經炳著卽行革職蔡文忠王忠祿夏思忠均著革職仍留軍營效力贖罪所有守城打仗出力文武員弁兵勇著毛鴻賓擇尤保奏毋許冒濫

毛鴻賓又奏言接奉

諭旨飭調鎮筸官兵赴浙臣查鎮筸額兵四千六十一名除奉調出師外現存營兵僅一千七百餘名適石逆大股闖入楚疆蔓延靖州辰州乾州

永綏各屬均與鎮筰毗連三路籌防已覺不敷
分布礙難再行調派所有慶端請調鎮筰官兵
赴浙之處應請俟邊防肅清再由臣酌量辦理
奏入報

聞

同日

上命議政王軍機大臣傳諭左宗棠曰昨據左宗棠

瀝陳援浙布置各情形已諭令暫扼衢州再圖進
剿因思浙省兵勇本有五六萬名之多平日挾制
官長擾害地方以致浙省被賊竄陷現在該兵勇
降賊及爲匪者諒復不少而衢徽等處已有逃勇
紛紛前往若不設法收集必致爲害地方著左宗
棠卽行派員招集其馴良羸弱者盡數遣回備有
桀驁不馴之徒卽分別正法以肅軍令毋稍姑息

前因將軍瑞昌巡撫王有齡殉難情形並杭城文武下落未據薛煥詳細奏報曾諭令該撫等查明具奏該將軍等困守危城兩月之久卒以身殉情形甚屬可憫提督張玉良據薛煥奏稱在城外中礮陣亡是否屬實均著左宗棠就近迅速查明分別請卹至總兵況文榜前據薛煥奏於破城之時因傷病離營羅大春吳再升副將貴廷芳陳步高

等在城外紮營紛紛潰退深堪痛恨著左宗棠一併就近傳旨拏問按照軍法從事浙江藩司林福祥於杭城喫緊之際不思固守輒以帶兵防堵諸暨爲詞迨賊撲諸暨不能抵禦退守義橋現在杭城已陷該員不知逃往何處饒廷選前守杭城頗著勞績此次帶兵赴紹興一帶防剿竟未與賊交锋甚爲畏葸以上各員均著左宗棠查明下落儻

有退避等情必當會同曾國藩奏請嚴辦浙省因
軍律不嚴兵驕將惰卒誤大局該撫務當引爲前
車之鑒不可稍有濡忍庶號令嚴肅壁壘一新用
副委任

同日

上命議政王軍機大臣傳諭薛煥左宗棠曰福建糧
道趙景賢於上年十月內簡放現在尙未赴任聞

其在湖州本籍帶團勦賊謀略兼優戰功最著刻
下閩疆喫緊員缺久虛著薛煥左宗棠密速設法
傳諭該道如湖州紳士中有膽略素優士民悅服
之員可資接替卽著該道將經手事件交代輕裝
赴任籌畫布置儘能移其捍衛桑梓之力以保障
閩疆厥功亦屬甚偉該道起程後卽著薛煥左宗
棠迅速具奏

初七日庚寅都興阿奏言據探蘇常逆匪分撲小

河口太平港等處江陰逆首陳坤書賊目黃詳

磨與壽星沙匪徒錢幅等勾合欲行北竄又據

鎮江府知府金以誠稟太平洲沿江一帶連日

有大股賊衆焚掠勢欲北渡臣卽會同黃彬令

總兵吳全美帶領將弁駛赴下游各港防剿又

由瓜防分撥礮艇三十餘隻分投防剿其小河

日太平港等處賊匪經吳全美等各帶艇師開礮轟擊斃賊數十名溺水死者甚多黃彬駛至划子口見有新設賊卡數處親督將弁連環轟擊該逆出卡沿岸拋擲火具黃彬指揮將士登岸勦殺立將賊卡焚燬斃賊甚多並將瓜埠賊巢踏毀奪獲賊船二隻擒斬二百餘名遂於冬溝龍王廟等處分撥師船嚴密探勦現聞六合

收復天長賊勢已孤臣派侍衛色楞額等督帶
隊伍前往天長相機剿辦乃行抵該處天長城
賊已降於李世忠遂將隊伍撤回天六踞逆旣
經招撫西路防務已鬆惟軍興年久游兵散勇
處處潛藏抵隙勾擾是其慣技初降人衆良莠
難齊防範更宜嚴密所有江岸一帶仍飭各營
加意盤查以免疏失

都興阿又奏言據探鎮城官軍與賊接仗未能
得手鎮揚屑齒相依亟應撥隊策應當飭總兵
詹啟綸派員帶勇千名並札飭副將刁經明率
都司田興富帶湖南兵一營參將繆勝帶捷壯
勇一營星夜渡江齊赴鎮城扼紮助剿如賊情
猖獗臣再當抽撥兵勇分投援應

同日馮子材魁玉奏言十一月二十五日據探

逆會定於二十六日糾率悍賊滾營前進意圖直逼城外臣等細心審度此次逆衆來犯若僅憑城固守未免示弱啟驕不若率軍迎勦力摧其鋒則背水孤城方不爲其所困當派總兵陶茂森協領崑山副將黃朝恩等督率各軍由馬鞍山等處分道進攻二十六日該逆由上塘筍岡等處糾黨前驅陶茂森指揮各軍攔頭迎擊

斃賊甚衆羣逆敗潰副將文龍德等乘勢跟追將至上塘忽見馬陵援賊約七八千由孔巷駙馬莊一帶繞出划子橋地方欲襲我後崑山等督隊攔截該逆大股包抄我軍殺入賊叢崑山力戰正酣忽受矛傷落馬猶手刃悍賊數名力竭陣亡參將楊青山等帶兵策應陶茂森文龍德派兵合攻連斬賊目二名我軍鼓勇分追該

逆退回老巢固守是役以寡敵衆將賊擊回是以該逆未得滾營前進臣等惟有督同在城文武員弁及各營將士實力防勦現經都興阿派副將刁經明統帶兵勇二千名來鎮協助鎮防得此兵力定當力圖進取陣亡之副將署左翼協領崑山貴州大定協左營都司張金全儘先千總陝西河州營額外周金玉把總李登成外

委胡正剛應請

旨飭部從優議卹均奏入

上命議政王軍機大臣傳諭曾國藩都興阿黃彬馮子材魁玉曰鎮江一城爲江南北樞紐賊匪水陸撲犯馮子材等堵剿未能得手業經都興阿派委總兵詹啟綸督帶兵勇前往援救卽著催令星速渡江相機助剿現在賊勢趨重鎮江而金陵蘇常

各匪復圖竄擾江北李鴻章所統水陸各軍六七千人如能早到不獨鎮城可資保衛亦可壯江北聲勢著曾國藩催令該員迅卽起程無稍遲緩馮子材等防守鎮江務須於賊衆將至之先派兵迎勦方能得力儻俟其進逼城闔或將附近沿江城卡占踞始行攻擊必致勢成坐困卽著該總兵悉心策畫勿誤機宜江防水師雖經獲勝惟壽星沙

等處賊匪亟應掃蕩淨盡以固北岸藩籬都興阿等諒能妥爲籌辦天長收復尙未據袁甲三奏報都興阿以該匪投誠恐難深恃不爲無見所有西路防務仍著嚴密布置江浦賊已窮蹙及其餘被占地方仍著該將軍等速籌攻克毋任久踞前因甯波鎮海失守經都興阿調派總兵鞠耀乾統率所部駛赴吳淞口扼剿所有吳淞口師船如須續

調以厚兵力卽著都興阿等速爲派撥其上海近日情形並著都興阿馮子材等就近確探隨時馳奏正在寄諭間據馮子材等奏稱連次剿賊獲勝並稱賊衆來犯如僅憑城固守未免示弱啟驕不若率衆迎剿力摧其鋒所見甚是仍著該總兵等督飭兵勇並刁經明協剿之師將附近鎮江一帶賊壘迅速踏平力圖進剿毋稍遲誤

上諭內閣曰鎮軍勦賊獲勝該逆遁回老巢著卽督飭員弁將附近賊壘迅速攻拔毋令該匪負隅再出滋擾儘先副將署左翼協領崑山貴州大定協左營都司張金全儘先千總陝西河州營額外周金玉把總李登成外委胡正剛力戰捐軀殊堪憫惻均著交部從優議卹

初九日
壬辰袁甲三李世忠奏言
臣等於克復六

合後卽擬乘勝進攻天長臣李世忠以明攻不如暗襲飭黃朝棟將所部降衆挑選五百人暫緩薙髮爲豫備襲城之計適黃朝棟舊部天長賊目王登壽來營投誠而守城賊首陳仕明素與黃朝棟交好卽令黃朝棟專函招撫仍飭王登壽趕回密遞一面選派隊伍令黃朝棟帶領前進臣李世忠督兵繼之二十五日兵至城下

給稱賊援已到陳仕明正在城上巡視開門接
應總兵王茂元李昭宸等奮勇衝入臣李世忠
督隊繼進賊衆驚亂我軍與陳仕明之衆四面
兜殺將負固賊衆擒斬殆盡天長縣城遂於是
日克復陳仕明部衆數千人飭令一律薙髮分
別遣散地方均就肅清臣等查天長東接揚郡
北界清淮爲皖省東南要隘久爲賊踞今賴

皇上天威賊首帖然歸正成功甚易不特皖北可望
肅清卽高寶清淮一帶亦無南顧之憂所有出
力之總兵李昭宸王茂元均擬請補缺後以提
督遇缺題奏李昭宸並

賞加勇號投誠內應之陳仕明更名陳振邦擬請以
遊擊儘先補用並

賞戴花翎頭目余瑞龍王登壽龔玉成吳天才尤得

宏均擬請以都司儘先補用並

賞戴花翎其餘在事出力文武員弁勇丁可否彙入
克復六合案內擇尤酌保出自

聖主鴻施再探聞金陵賊衆竄至滁全交界之小店
地方臣李世忠將天六布置嚴定卽行回滁相
機剿辦乘勞規復江浦仍留候補道李元忠暫
駐天長妥爲料理

袁甲三又奏言查李世忠駐守滁州經臣多方
激勸竟能星夜奔馳辦理內應三日之內連克
二城實於軍務大有裨益應請

酌予賞件以鼓其氣責令將江浦浦口收復惟此次
天長之克該提督收撫降衆數千人臣已飛函
囑令核實去留以節經費可否請

旨飭臣督同李世忠遇有降衆分別遣散勿許多留

之處恭候

聖裁

袁甲三又奏言疊奉

諭旨飭查賈臻奏報粵匪情形並廬郡是否克復遵
查張逆於十二月初十前後竄近潁郡官兵疊
次出城迎剿聞賊已退至潁東數十里至賈臻
所奏陳逆踵至正陽關及續撥粵逆八萬並無

其事其程保民於南照等處屯踞之說不爲無
因查程保民本住潁東之程家圩因該圩被苗
沛霖攻破遂投入粵逆臣已囑其族人專信開
導招徠能否反正尙未可知現在廬郡未經克
復南路防勦喫緊李世忠又在天六一帶連次
克城隊伍萬難抽撥是以先經函致道員蔣凝
學妥籌援剿據該道函稱賊匪欲出光固並抄

六霍後路分我兵力已稟請官文李續宜籌調
馬步迅由光固一帶迎勦至廬郡情形疊據探
報陳玉城與陳得才互相疑忌陳玉城恃其黨
衆欲令陳得才帶隊由西鄉前往壽州一路會
晤臣卽飭遊擊吳殿元攜諭先往西鄉會同該
處團練設法截賊去路並囑招撫陳得才率黨
攻擊英逆現在楚師克復巢縣六安舒城均有

勁兵堵截廬賊竄路旣窮祇有潁壽尙通一綫
自當會商楚師一體防範惟李續宜來函謂欲
清皖北必力爭廬壽俟楚撫接替有人卽可督
師入皖彭玉麟來信謂未能舍舟登陸曾國藩
亦言彭玉麟不能遽離水師擬令楚軍知會臣
營先規廬郡臣自當隨時商辦至賈臻所奏苗
沛霖已赴臣營乞撫一節並無其事惟據前次

派往之署壽春鎮博崇武及勝保委員州同方模勳等回營而稟附近壽州各圩民薙髮漸多似有轉機臣已飭令傳諭苗沛霖如能速除潁州之賊自明心跡再行斟酌辦理奏入

上命議政王軍機大臣傳諭袁甲三李世忠曰袁甲三等奏克復天長縣城分別勦撫天長東接揚州北界清淮爲皖省東南要隘賊踞日久此次成功

甚速皖北可望肅清卽高寶清淮一帶亦無憂南
顧所辦尙爲得手現聞金陵賊衆竄至滁全交界
小店地方李世忠將天六布置稍定卽著回滁相
機勦辦並乘勢規復江浦浦口節節掃蕩以斷賊
援而通進兵之路天六兩縣都興阿當可就近派
軍駐守著卽咨商辦理以便李世忠盡率所部爲
進圖江浦之計天長降衆著該大臣酌量遣留現

當餉項支絀此後遇有降衆並著袁甲三督同李世忠分別遣散毋許多留以期餉不虛糜兵歸實用袁甲三另奏探悉潁郡情形並函商楚軍進剿各等語李世忠所部此時既難撥往潁郡該大臣業據道員蔣凝學稟請官文李續宜添調馬步由光固進剿著卽隨時咨會辦理楚師克復巢縣尙未據有奏報舒六現有楚軍堵截廬州賊匪竄路

已窮惟有穎壽一綫可通自當速與楚師會商聯絡力爭廬壽穎州軍情雖賈臻奏報跡涉張皇如該大臣所奏各情亦係得自傳聞惟當隨時確實偵探妥籌兼顧勿稍大意

上諭內閣曰官軍克復六合縣城後進取天長提督李世忠親督兵勇將天長縣城克復地方均就肅清所辦甚爲得手江南提督李世忠於三日內克

復六合天長兩城實屬謀勇兼長著賞給珊瑚豆
大荷包二對小荷包四對白玉翎管一枝白玉四
喜搬指一箇白玉煙壺一箇白玉佩一件以示優
獎仍卽督飭兵勇將江浦浦口收復痛埽逆氛記
名總兵李昭宸王茂元均著俟補缺後以提督遇
缺題奏李昭宸並賞加嚴勇巴圖魯名號投誠內
應之陳仕明更名陳振邦著以遊擊儘先補用並

賞戴花翎頭目余瑞龍王登壽龔玉成吳天才尤
得宏均著以都司儘先補用並賞戴花翎其餘在
事出力文武員弁兵勇著袁甲三等彙入克復六
合案內擇尤保奏候朕施恩

欽定勦平粵匪方略卷二百八十七 壬戌年

正月初十日

癸巳

薛煥奏言十二月十三日乍浦

逆匪十餘萬由海埔竄奉賢縣屬之南橋鎮參將姚紹修等督率兵團出隊迎擊疊有斬擒十五日該逆攻破我軍營盤姚紹修等均受矛傷所部傷亡甚多因卽撤退該逆遂分三股竄撲奉賢南匯川沙三廳縣各該處兵團不敷守禦

逆氛驟至俱不能支於十七十八十九等日相繼失守賊蹤現徧寶山及吳淞口松滬路徑紛歧無險可扼臣與曾秉忠所部水陸各軍雖有三四萬人而派防隘口二三十處兵分見少實難當此大敵前經請援於曾國藩一面派委副將滕嗣林附搭輪船赴湘募勇一萬餘名限十二月初旬趕到嗣接曾國藩回函須俟明春派

道員曾國荃帶勇八千名來滬助剿滕嗣林新募之勇到滬者僅七百人餘俱未到近日鎮江軍情緊急揚營分兵助剿又未便乞師於鎮揚惟有竭力布置俟曾國荃統軍到時掃除逆燄庶有轉機至吳淞口爲江海關鍵深慮該逆搶船肆擾前調大江戰船已由都興阿咨會黃彬派總兵鞠耀乾督帶大船等艇十一號駛赴吳

淞口迄今尚未到防臣已遵

旨飛催如海口有警尙須添調得力礮船截剿此次
奉賢南匯川沙三城被陷臣疏於防範應請

旨將臣交部議處所有文武各官下落容俟查明奏
報至南橋防軍潰退雖因衆寡不敵帶兵將弁
究有應得之咎亦俟查明分別參奏

薛煥又奏冒據同知謝鴻達等稟稱十二月二

十日逆匪三路攻撲胡學莊水營謝鴻達督率
戰船連開大礮斃賊無數該逆愈來愈多搶去
戰船三隻寶山縣知縣曹錫燾參將姜德派隊
助剿賊始退去二十一日復有大股由蘊藻河
兩岸直撲吳淞鎮北岸之賊竄至泗塘口遊擊
劉士奇督帶楚勇鏖戰數時將賊擊退南岸之
賊竄至吳淞對岸之西擺渡經姜德派勇擊退

賊又由南面繞至東擺渡我軍水陸夾擊轟斃
馬隊甚多該處本有法國輪船駐泊陸路並有
礮臺該國兵弁同時開礮轟擊斃賊無算餘向
江灣一路竄遁臣仍督飭水陸將弁加意防範
以杜回竄

薛煥又奏言上海守城事宜臣已札飭藩臬兩
司督同委員挖濠築牆其洋涇濱西北兩面亦

經英法兩國與署藩司吳煦會商一律辦理以資堵扼江浙兩省紳士前請會商英國借師助剿近因事勢危迫擬與該國官商設局籌防同心保護可否請

旨飭下總理衙門與英法二國駐京使臣會商定議庶於大局有裨

薛煥又奏言據道員趙景賢稟稱自杭城被陷

浙西祇存湖州一郡危城孤立近日西南賊蹤
屬集勢將以困杭者困湖雖兵力尙可支持而
軍需萬難刻緩稟請源源接濟等語臣查趙景
賢力保湖州府城實爲中流砥柱當此存亡呼
吸之時待餉急如星火自應代爲籌濟現據福
建委員黃鵬飛等解到浙餉一萬兩臣卽飭吳
煦照數覈收遴委幹員解往湖州並將粵省所

撥火藥設法轉解以濟急需又據趙景賢稟僞
忠王李逆差來賊黨李元林李元桂二名帶有
僞文一件訊據李元林供稱在杭帶勇保舉參
將現爲賊來說降查其僞文語多狂悖實屬罪
不容誅訊明後卽將李元林李元桂正法等語
合併陳明奏入

上命議政王軍機大臣傳諭薛煥曰浙省賊匪悉衆

東竄奉賢等三廳縣不守上海城守事宜業經薛
煥籌辦其松江等城應如何竭力嚴防藉資犄角
並就現有兵力相機迎剿以遏賊氛之處均著薛
煥悉心辦理至借師助剿一節若必俟總理衙門
在京商酌轉致稽遲卽著薛煥會同前次呈請各
紳士與英法兩國迅速籌商剋日辦理但於剿賊
有裨朕必不爲遙制薛煥所稱趙景賢固守湖州

將投遞僞文之李元林等正法等語趙景賢保守
湖郡實屬忠勇異常現已降旨優獎著卽將此旨
由薛煥傳示該員前曾有旨令該員速赴新任諒
一時亦難起程現已催令左宗棠迅速進兵並諭
曾國藩嚴催鮑超力攻甯國取道廣德援湖卽著
薛煥傳諭趙景賢悉力防剿以待援師其銀米火
藥等項該撫務須源源接濟勿任匱乏再奉賢等

城文武下落及南橋潰退將弁均著薛煥查明叅奏該撫自請議處並著俟奏到時再降諭旨

上又命議政王軍機大臣傳諭曾國藩左宗棠曰前因上海緊急諭令曾國藩迅速帶勇前往援剿並諭曾國藩催令李鴻章駐紮鎮江茲據薛煥奏江浙兩省逆匪糾衆東趨竄陷奉賢南匯川沙三廳縣寶山吳淞口情形喫重松江上海危急等語逆

匪李秀城悉衆東趨垂涎松滬勢甚猖獗上海一隅兵力不厚豈能當此大敵著曾國藩遵照疊次諭旨飛催曾國荃將所募湘勇留防安慶剋日督帶老勇八千救援上海擇要堵剿儻曾國荃尙無實在消息卽著該大臣另派勁兵前往援應薛煥又稱已飭副將滕嗣林赴湘募勇一萬餘人限於十二月內到滬至六到者甫數百人並著該大臣

就近嚴催無論已募若干人先行赴滬助剿毋得藉口人數未齊稽延時日其李鴻章所帶兵勇已抵何處連日未據該大臣奏報並著再行嚴催該道到鎮後一面由該督飛速奏聞一面飭令相機由閒道進攻壽賊之虛攻其必救固當兼顧鎮城亦當籌分上海松江等處賊勢毋稍大意現在賊勢趨重蘇省浙省各屬空虛必有機會可乘並著

左宗棠趕緊進兵迅圖規復郡邑湖州一府四面
皆賊經道員趙景賢督團固守賴以保全實屬義
勇可嘉該郡地方緊要必須力策萬全著曾國藩
左宗棠催令鮑超一軍迅攻甯國甯國旣克便可
由廣德打通湖州一綫之路方能聲勢聯絡左宗
棠前保之劉培元並著催令迅速前赴衢州責令
力籌衢州一路防剿前有旨令趙景賢赴福建糧

道新任此時湖州喫緊防務能否接替有人俾該道赴任之處並著曾國藩等酌度情形辦理

上又命議政王軍機大臣傳諭都興阿黃彬曰據薛煥奏十二月十五日南橋等處之賊分爲三股竄撲奉賢南匯川沙三廳縣於十七十八十九等日相繼失守賊勢猖獗松江上海危急等語鞠耀乾水師早經該將軍等派撥何以任令遷延至今尙

未到防吳淞口爲江海關鍵設有疏虞大局何堪
設想著都興阿黃彬迅飭鞠耀乾督帶大船等艇
十一號趕緊起程速赴吳淞口駐泊扼堵現在賊
勢猖獗並著添派得力礮船前往援救以期力保
完善

上又命議政王軍機大臣傳諭慶端瑞瑱勞崇光耆
齡曰薛煥奏奉賢南匯川沙三廳縣被賊竄陷復

分路攻撲寶山吳淞松江上海情形危急等語逆
首李秀城自攻陷杭城後糾聚逆匪東趨上海兵
勇不過三四萬人派防各要隘已覺兵分力絀值
此大敵當前非厚集援師不足以維大局吳鴻源
所帶兵勇一千五百名計已航海駛抵曹娥江著
慶端瑞璜卽飭該副將統帶所部兵勇由海道迅
速駛赴上海併力防剿以期掃除逆燄保衛滬城

毋稍遲誤此外如有可撥師船兵勇並著慶端等酌量續派前往援救毋得稍分畛域致誤事機並著該督飭催李元度等迅由壽昌一路攻取杭城等處以牽賊勢廣東水師礮船素稱得力現在該省地方漸就安靖著勞崇光耆齡迅速調撥師船派委得力將弁統帶星速由海道赴援上海以利攻剿所有各水師兵勇糧餉火藥均各寬爲籌備

毋誤師行到滬以後各兵勇均歸薛煥調遣以資
統率

上諭內閣曰福建督糧道趙景賢在浙江湖州府本
籍督帶團練殺賊守城戰功卓著現當杭州省城
失守該員尙能激勵鄉團力保湖州郡城及所屬
地方並將降賊遞送僞示之李元林李元桂二逆
立即正法洵足伸大義而固人心在辦團人員中

最爲異常出力趙景賢著賞加布政使銜以示優
獎

十三日
丙申

上命議政王軍機大臣傳諭曾國藩左宗棠李續宜
曰曾國藩左宗棠李續宜等均負時望卓著戰功
疊經先後簡任督撫畀以重任曾國藩節制四省
左宗棠雖簡任浙撫並諭以不必爲地方職守牽

制復因皖事孔亟以李續宜移調皖撫原冀合力
通籌力挽東南大局現在江浙賊氛恣肆亟應設
法進兵早圖恢復前經曾國藩等奏稱克復曹鎮
無爲方冀東征之師可以直下江南乃自去冬以
來該督撫等奏報甚稀幾於月僅一至而浙省嚴
州紹興甯波杭州等府縣各城疊次報陷蘇省松
江上海吳淞口等處警報頻來皖北則苗練與髮

逆交乘圍頗甚急賊氛到處蔓延日甚一日朕以
冲齡嗣位荷蒙兩宮

皇太后孜孜求治舉賢任能焦勞宵旰日與議政王軍
機大臣籌商軍務每於該大臣等奏報到時詳加
披覽一切規畫輒深嘉許冒聽計從想該大臣等
勝算老謀於大局必早有布置惟賊氛日熾而章
奏寥寥南服惓懷殊深廑念現在曾國荃募勇是

否到營李鴻章帶兵是否到鎮鮑超進規甯國能
否得手多隆阿蔣凝學等軍曾否分攻廬壽楊載
福何時可以銷假回營與彭玉麟併圖東下兵貴
神速東南之民待救孔急而軍情變幻靡常總宜
趕緊辦理其如何通籌全局緩急兼權均著崇一
切機宜隨時馳奏以紓懸系顧郡關北路之防湖
州府海甯州前據該大臣奏稱尙能堅守上海爲

餉源所自出吳淞口守禦尤要曾國藩左宗棠李
續宜等如何布置籌畫萬全之處均著隨時分別
馳奏毋再稽延

十四日丁酉兼署貴州巡撫提督田興恕奏冒臣

前因石逆由粵竄楚派參將朱淩漢等軍前往
兜剿現據該參將稟稱十月二十一日由龍溪
馳抵鳳凰聽探聞石逆攻陷會同竄擾芷江縣

屬之榆樹灣等處距鳳凰廳不遠賊勢飄忽恐
由該處竄入川界經辰沅道兆琛等將此軍留
防該廳扼紮喜雀坡旋據署撫臣江忠義函稱
石逆屯聚榆樹灣意在伺隙而遁因派五營兵
將進扼麻陽芷江居中之石板十一月十三日
三路並進大獲勝仗擒斬悍匪千餘名該逆乘
閒由懷化驛遁竄自眉河北渡襲踞浦市窺伺

瀘溪該署撫山賊不意截其前路乘勢掩殺俘
馘千餘該逆遂由瀘溪向乾州保靖永順一路
竄逸其爲假道入蜀已無疑義該署撫一軍已
出永順之王村司相機截擊黔省前派援軍尙
在賊後囑臣另行調撥等語臣查石逆此次由
粵竄楚楚南兵勇雲集該逆勢難下竄惟川省
近因藍李股匪不靖精兵悉在西北川東一帶

必形空虛若被石逆竄入爲患曷可勝言黔蜀
唇齒相依自當不分畛域先期布置該逆如果
窺蜀必由酉秀黔江等處西竄重慶現飭朱凌
漢等統帶原部撤赴川黔交界之思渠龔灘等
處探蹤截擊並咨四川督臣駱秉章分飭川東
鎮道督同地方文武嚴密堵剿如兵力不敷分
布卽由臣添調前往會合剿擊不令闖入川疆

至派赴會同之成應洪一軍亦距賊較遠臣已
飭令撤回古州分勦苗教各匪早靖邊隅奏八
上命議政王軍機大臣傳諭駱秉章田興恕毛鴻賓
曰田興恕奏石逆由粵竄楚攻陷會同竄擾芷江
縣屬之榆樹灣等處襲陷浦市窺伺瀘溪經江忠
義分投截勦連戰皆捷該逆不能下竄遂由瀘溪
向乾州保靖永順一路竄逸其爲假道入蜀無疑

該大臣已飛檄候補叅將朱凌漢等援楚官兵撤
赴川黔交界之思渠龔灘等處迎頭截擊洵能不
分畛域深堪嘉尚石逆垂涎川省已非一日現既
由永順一帶趨蜀必由酉秀黔江等處西竄重慶
著駱秉章卽飭川東鎮道督率兵勇會合朱凌漢
一軍嚴密堵截如兵力不敷分布卽著添調勁兵
前往助剿或咨商田興恕調派兵勇會合兜擊務

令該逆不得闖入川疆方爲妥善江忠義一軍已
出永順之王村司扼截著毛鴻賓咨令迅圖進取
相機勦擊以固楚省邊防並扼該逆入川之路勿
稍疏懈

同日慶端奏言前因紹興失守派曾玉明添募
臺泉壯勇赴甯援勦原冀力保甯波以爲規復
紹興地步不意援師未集而甯波已失此時航

海之師並無屯紮之處自應併歸陸路分路進
剿一由溫台直擣甯紹一由處州直擣金蘭一
由衢州直擣嚴杭一城旣拔全局乃振惟浙省
徧地賊氛三路均需厚集精銳方免爲賊牽掣
李元度一軍馳救杭州以悍逆節節抗拒未能
直達現在杭城旣失衢州危急暫飭保固衢防
第李元度一軍合之總兵李定太所部不過萬

餘人以目前賊勢而論尙形單薄專盼左宗棠
剋日抵衢方可會商進剿李元度旣令駐衢竊
恐處州踞逆非由遂昌以犯衢州必將由景甯
以犯溫郡況雲和縣城現報克復賊衆擾及景
甯甯甫經擊退溫州三面皆賊情形可危總兵秦
如虎剿辦平陽會匪正當喫緊尙難遽抵溫郡
現飭林文察統帶臺勇與林文明所部合隊進

攻處州期與衢溫各軍聯絡聲勢

慶端又奏言探聞匪首王瑞改名汪瑞投入髮
逆糾集匪艇欲由海道來閩查聞省各海口以
五虎爲福州省城門戶首當其衝其次則福甯
之東衝福州之羅源連江及廈門泉州再次則
海壇金門銅山等處南北二千餘里防不勝防
五虎海口雖有吳鵠源統帶兵勇戰船並於陸

路建設礮臺兵力究形單薄查有候補提督福甯鎮總兵曾玉明前委統師航海援浙嗣因甯波失守改由陸路進兵當令曾玉明來營統帶臺勇進攻處州茲處州一路已調總兵林文察督兵前進而近省五虎海口喫緊經臣飛調省標兵丁並酌撥續到臺勇卽委曾玉明統率前赴五虎口扼紮督同吳鴻源實力防堵一面飭

委署臬司劉翊宸署督糧道丁曰健會商布置
其福甯海口責成道員曾憲德妥籌防堵仍由
撫臣瑞璜就近調度奏入

上命議政王軍機大臣傳諭慶端左宗棠曰浙省徧
地賊氛必應厚集精銳分投進剿慶端現議分兵
三路一由溫台直擣甯紹一由處州直擣金蘭一
由衢州直擣嚴杭著卽飭李元度林文察秦如虎

等各統兵勇實力進剿左宗棠應已由廣信進駐
衢州慶端應否駐紮衢州著卽會同左宗棠和衷
商辦毋失機宜湖郡賊氛環逼慶端左宗棠必須
酌量先分一旅之師與趙景賢聯絡聲勢方不致
孤城坐困匪首王瑞改名汪瑞投入粵匪糾集匪
艇犯閩無非爲牽掣閩兵赴浙之計慶端已派總
兵曾玉明統率兵勇赴五虎口扼堵並令署按察

使劉翊宸等會商布置著卽知照瑞璜就近調度
無涉鬆懈該督仍當以浙事爲重與左宗棠迅速
規復各城不得以該匪聲稱犯閩爲所牽掣至副
將吳鴻源據稱現駐五虎口此時上海情形萬分
危急非得水師援救深恐有失該督旣飭曾玉明
回閩所有吳鴻源一軍可否抽調援滬卽著慶端
斟酌速辦毋得稍分畛域

慶端又奏言玉環廳沿海一帶盜船出沒焚搶土匪蠭起經署玉環同知白讓卿會合兵團截拏擊斃盜匪多名十一月十二日坎門洋面有盜船多隻肆行搶掠白讓卿會商守備趙炳華各帶兵勇馳往擊退斃匪數十人十三日白讓卿等由坎門回城甫至半途忽報逆犯王璣勾結偽丞相朱奮鏞另股匪徒一千餘人乘虛竄

擾廳城白讓卿等商令守備王萬春管帶水師
號召團練並派親信丁役入城密約民團作爲
內應十四日夜間白讓卿等分兵進攻十五日
殺賊數百名該匪四散奔逃白讓卿等揮軍跟
追復斃賊匪無數斬獲匪首王璣朱雪鑣等多
名當將玉環廳城克復該廳城被匪闖入同知
白讓卿等先期出城捕盜聞報後約同兵練將

賊擊退功過尙足相抵應請免其置議其餘玉環文武各官候查明另行覈辦奏入

上諭內閣曰上年十一月十三日逸犯王璣勾結另股賊匪朱奮鏞逆黨一千餘人竄入浙江玉環廳城時署玉環同知白讓卿等由坎門捕盜馳回會合水師團練於十四日夜分兵進攻十五日將廳城賊匪擊退玉環廳城於十三日失守何以白讓

卿等適於十二日出城捕盜難保無聞警先逃砌
詞捏飾情弊著慶端秉公確查據實具奏毋稍徇
庇其餘文武各官下落並著查明叅奏

慶端又奏言浙江雲和縣城失守後署知縣柯
沅召集團丁馳赴棧雲橋設險守禦該逆疊次
竄撲均經團丁擊退上年十二月初二初三兩
日柯沅會督營縣典史並職員季甘棠等集勇

二千八百餘名分路抄擊並約慶元縣知縣何
福恩派撥壯勇助守要隘初四日柯沅等分路
赴城環攻該逆由西門出隊抗拒我軍三面撓
合槍礮齊施該逆由東門逃竄柯沅督率團丁
併力追殺斃匪無數餘匪遠遁當將縣城收復
署雲和縣知縣柯沅失守城池本有應得之罪
惟現當賊燄方張該員能卽集團克復尙知愧

奮應請

旨將署雲和縣知縣補候知縣柯沅免其治罪仍革
職暫留署任以觀後效此外同城文武容俟確
查覈辦奏入

上諭內閣曰署雲和縣知縣柯沅前經失守縣城本
有應得之咎此次督團收復尙知愧奮著免其治
罪仍革職暫留署任以觀後效該城文武下落並

著慶端查明具奏

十五日戊戌馮子材魁玉奏言逆首僞普王糾率

蘇杭大股悍逆並會合僞兌王等股力攻鎮城

臣等督率在防將弁嚴密扼堵十二月三十日

至正月初二等日該逆疊次撲犯悉被我軍擊

退初四日九華山西煙墩山一帶賊衆三四千

名由烏峯口奔撲西南兩門擲草填濠勢極猖

一
鰲我軍槍礮齊施轟斃賊目數名餘逆死者無
數提督賴鎮海督飭師船連開大礮將煙墩山
等處之賊轟斃甚多賊始披靡賴鎮海挑選奮
勇派都司黎敬復等分伏山凹要口扼賊來路
三更後賊衆攜帶雲梯銜枚疾走伏兵四起截
擊槍礮連施該逆不知官兵衆寡棄械驚潰我
軍奮勇截殺計奪獲雲梯二十餘架槍械三十

餘件初五日薄暮該逆大股由丹徒奔撲北門
困我城外營盤分股直撲東南兩門勢如潮湧
參將鄭榮勛率領各船連開大礮斃賊多名都
司黃萬仝督兵登陸追擊頗有斬擒參將林從
太等由北固山下突出截殺總兵陶茂森派遊
擊向心照等帶勇夾攻當將賊陣衝散斃匪無
算逆衆敗遁初六日賊黨復犯西南兩門亦經

我軍擊退此次該逆更番撲城雖經疊次懲創
難保不思復逞臣等惟有督率文武員弁加意
嚴防

馮子材魁玉又奏言查鎮城爲南北咽喉要隘
現當賊氛逼近兵勇竭力守禦全賴口糧充足
方能作士氣而固軍心江北現辦一切捐項自
應先儘鎮營之用應請責成漕臣吳棠督飭局

員徹底查明定期定數按月分解其海關餉銀
應請責成撫臣督飭蘇松太道儘力抽撥並請
旨飭催廣東撫臣按月措解銀三萬兩運解鎮營以
資湊發庶於防剿有裨奏入

上命議政王軍機大臣傳諭曾國藩都興阿馮子材
曰鎮江爲南北咽喉賊衆必爭之地金陵逆匪連
日力撲鎮江雖經馮子材等設法固守第賊衆兵

單設該逆仍更番來犯其勢恐不能支曾國藩前奏令李鴻章帶水師五千名陸軍六七千名前赴鎮江業已疊次催令迅往現在是否起程若不添此勁旅分道進攻丹陽等處以戰爲守則賊衆必聚併方鎮城設有疏虞非獨揚防喫緊卽江南亦無駐足之處著曾國藩迅飭李鴻章統帶水陸各軍馳往鎮江相機攻剿毋得遷延致誤大局都興

阿前已派副將刁經明等帶兵前往援救現在天
六等城次第克復揚防兵勇如可抽撥仍著酌量
派往馮子材等務當督飭將士攻守兼施不可稍
涉鬆懈以保名城

上又命議政王軍機大臣傳諭勞崇光耆齡吳棠薛
煥曰鎮城孤立江濱爲南北咽喉要隘現在賊衆
連番攻襲危城幸保餉需最關緊要所有江北現

辦一切捐項著吳棠督飭局員徹底查明覈定數
目先儘鎮營之用按月分解其海關餉銀著薛煥
督飭蘇松太道儘力抽撥並著勞崇光耆齡按月
捐銀三萬兩解赴鎮江軍營以資湊發